



ზოგადსაგანმანათლებლო
დანესახულებების ავტორიზაციის საბჭო

23/04/2025



MES 6 25 0000435273

გადაწყვეტილება

**ზოგადსაგანმანათლებლო დაწესებულებების ავტორიზაციის საბჭოს 2023 წლის 06 ოქტომბრის
N1315372 ოქმის მე-6 ნაწილში ცვლილების შეტანის შესახებ**

ზოგადსაგანმანათლებლო დაწესებულებების ავტორიზაციის საბჭოს სხდომაზე გამოვლენილი გარემოებების შესწავლის, შეფასებისა და ურთიერთშეჯერების შედეგად, საქართველოს ზოგადი ადმინისტრაციული კოდექსის 63-ე მუხლის პირველი პუნქტის საფუძველზე,

საბჭომ გადაწყვიტა:

1.შევიდეს ცვლილება ზოგადსაგანმანათლებლო დაწესებულებების ავტორიზაციის საბჭოს 2023 წლის 06 ოქტომბრის N1315372 ოქმის მე-6 ნაწილში და ჩამოყალიბდეს შემდეგნაირად:

**„6. სსიპ - ზესტაფონის მუნიციპალიტეტის სოფელ დილიკაურის საჯარო სკოლის
ავტორიზაციის საკითხის განხილვა**

საბჭოს თავმჯდომარემ, დავით მაღაზონიამ, დაწესებულების წარმომადგენლებს მიმართა, ხომ არ ჰქონდათ საბჭოს წევრების მიმართ აცილება. დაწესებულების წარმომადგენლებმა დაადასტურეს, რომ საბჭოს წევრების მიმართ აცილება არ ჰქონდათ.

საბჭოს თავმჯდომარემ მიმართა საბჭოს წევრებს, დაედასტურებინათ, რომ იცნობდნენ ავტორიზაციის ექსპერტთა ჯგუფის დასკვნას და დაწესებულების მიერ წარმოდგენილ არგუმენტირებულ პოზიციას დასკვნის პროექტთან მიმართებით. საბჭოს წევრებმა დაადასტურეს, რომ იცნობდნენ საქმის მასალებს. საბჭოს თავმჯდომარემ ჰკითხა დაინტერესებული მხარის წარმომადგენელს იცნობდა თუ არა ავტორიზაციის ექსპერტთა ჯგუფის დასკვნას. წარმომადგენელმა დაადასტურა, რომ იცნობდა დასკვნას. შესაბამისად, საბჭოს თავმჯდომარემ საბჭოს მდივანს სთხოვა, რომ ექსპერტთა ჯგუფის დასკვნა დაერთო ოქმისთვის, როგორც მისი განუყოფელი ნაწილი.

ექსპერტთა ჯგუფის დასკვნა საბჭოს სხდომაზე წარადგინა ექსპერტმა, პაშა გულორდავამ. ექსპერტმა განაცხადა, რომ სსიპ-ზესტაფონის მუნიციპალიტეტის სოფელ დილიკაურის საჯარო სკოლაში ავტორიზაციის ექსპერტთა ჯგუფის ვიზიტი განხორციელდა 2023 წლის 26 და 27 ივლისს. დაწესებულება მდებარეობდა ზესტაფონის მუნიციპალიტეტის სოფელ დილიკაურში. სკოლა ახორციელებდა დაწყებით, საბაზო, საშუალო საფეხურის ზოგადსაგანმანათლებლო პროგრამებს. პროგრამების განხორციელების ენა იყო ქართული. სკოლას თვითშეფასების კითხვარში მოსწავლეთა ადგილების ზღვრულ რაოდენობად მოთხოვნილი ჰქონდა 300 მოსწავლე.

ექსპერტის განაცხადებით, ჯგუფმა შეისწავლა სკოლის მიერ წარმოდგენილი დოკუმენტაცია, განხორციელდა ადგილზე დათვალიერება, ინტერვიუები. ადმინისტრაციული წარმოების პროცესში გამოიკვეთა რიგი შეუსაბამოებები და რამდენიმე კომპონენტი სკოლის მიერ შესაბამისობის უზრუნველყოფის გეგმის წარმოდგენის შემდეგ შეფასდა შემდეგნაირად:

პირველი სტანდარტი (სკოლის ფილოსოფია) შეფასდა, როგორც „შეესაბამება სტანდარტის მოთხოვნებს“, ვინაიდან კომპონენტი 1.1 (სკოლის მისია, ხედვა და ღირებულებები) და 1.2 (სკოლის დაგეგმვა და განვითარება) შეფასდა სრულ შესაბამისად.

რაც შეეხება მეორე სტანდარტს (სასწავლო პროცესის ადმინისტრაციული და ინფრასტრუქტურული მხარდაჭერა) ასევე შეფასდა, როგორც „შეესაბამება სტანდარტის მოთხოვნებს“, ვინაიდან მხოლოდ ერთი კომპონენტი 3.4. (ადამიანებისა და პროცესების უსაფრთხოება) შეფასდა მეტწილად.

ექსპერტმა, პაშა გულორდავამ, ასევე ისაუბრა გარკვეულ ინდიკატორებთან მიმართებით გაცემულ რეკომენდაციებსა და რჩევებზე, რომლებიც დასკვნაში დეტალურად იყო გაწერილი. ექსპერტის განცხადებით, ასევე, სრულ შესაბამისობაში იყო მეოთხე სტანდარტის (მოსწავლეთა მხარდაჭერა) ორივე კომპონენტი, 4.1 (მოსწავლეთა უფლებების დაცვა) და 4.2. (მოსწავლეთა მხარდაჭერის ღონისძიებები).

რაც შეეხება მეორე სტანდარტის-სასკოლო კურიკულუმის ოთხივე კომპონენტს: 2.1(კურიკულუმის შემუშავება), 2.2(კურიკულუმის განხორციელება), 2.3(კურიკულუმის მონიტორინგი და შეფასება), 2.4(კურიკულუმის გადასინჯვა და რევიზია) ექსპერტთა ჯგუფმა შეაფასა როგორც სტანდარტთან შესაბამისი.

ექსპერტმა, პაშა გულორდავამ ისაუბრა სკოლის საუკეთესო პრაქტიკის თაობაზე. მისი განმარტებით, დაწესებულება გამოირჩეოდა მაღალი სასკოლო კულტურით, ურთიერთთანამშრომლობით, გამოცდილების გაზიარებით, სკოლის პროგრესზე ორიენტირებული სასკოლო საზოგადოებით. სკოლა იყო ახალი რეაბილიტირებული და ადაპტირებული, ჰქონდა ნათელი ოთახები, დერეფნები და შესაბამისად აღჭურვილი საბუნებისმეტყველო ლაბორატორია. ასევე, სკოლას ჰქონდა სტანდარტთან შესაბამისი სპორტული დარბაზი, ბიბლიოთეკა, კომპიუტერული ლაბორატორია და რესურსოთახი.

საბჭოს თავმჯდომარემ კითხვით მიმართა საბჭოს წევრებს, ხომ არ ჰქონდათ შეკითხვები ექსპერტებთან ან სკოლის წარმომადგენლებთან.

საბჭოს მდივანი მანანა ჯინჭარაძე დაინტერესდა სკოლაში არსებული წიგნის კლუბის ფუნქციონირებით და მიმართა სკოლის წარმომადგენელს, ესაუბრა კლუბის საქმიანობის შესახებ, დაწესებულების წარმომადგენელმა აღნიშნა, რომ კლუბი ფუნქციონირებდა ძირითადად სახელმწიფო ენის კათედრაზე, მოსწავლეები აქტიურად იყვნენ ჩართული

სხვადასხვა ლიტერატურული ნაწარმოებების კითხვასა და განხილვაში, რაც ზრდიდა წიგნიერების დონეს. საბჭოს მდივანმა, რეკომენდაცია გასცა კლუბის წესდებასთან დაკავშირებით, რასაც დირექტორის მოვალეობის შემსრულებლის განმარტებით, სკოლა გონივრულად გამოიყენებდა და გამოსწორებდა ხარვეზს.

რჩევა გასცა ასევე, საბჭოს წევრმა, მორის დანდურიშვილმა, შრომით ხელშეკრულებებში ასახულიყო სავალდებულო პირობები საქართველოს განათლებისა და მეცნიერების მინისტრის „საჯარო სკოლის დირექტორსა და მასწავლებელს შორის დადებული შრომითი ხელშეკრულების სავალდებულო პირობების დამტკიცების შესახებ“ N959 ბრძანების საფუძველზე.

საბჭოს თავმჯდომარემ, მიმართა საბჭოს წევრებს, ხომ არ ჰქონდათ შეკითხვები სკოლის წარმომადგენლებთან ან ექსპერტებთან.

საბჭოს წევრებს შეკითხვები არ ჰქონდათ.

საბჭოს თავმჯდომარემ, კენჭისყრაზე დააყენა სსიპ - ზესტაფონის მუნიციპალიტეტის სოფელ დილიკაურის საჯარო სკოლის ავტორიზაციისა და მოსწავლეთა ადგილების ზღვრული რაოდენობის 300-ით განსაზღვრის საკითხი.

კენჭისყრის შედეგები:

მომხრე - 12

წინააღმდეგი - 0

გადაწყვეტილება:

გადაწყვეტილება: „განათლების ხარისხის განვითარების შესახებ“ საქართველოს კანონის მე-11 მუხლის მე-2 პუნქტის „ა“ ქვეპუნქტის, მე-12 მუხლის, საქართველოს განათლებისა და მეცნიერების მინისტრის 2010 წლის 1 ოქტომბრის N99/ნ ბრძანებით დამტკიცებული „საგანმანათლებლო დაწესებულებების ავტორიზაციის დებულების“ მე-20 მუხლის პირველი პუნქტის „ა“ ქვეპუნქტის, მე-2 და მე-4 პუნქტების და 21-ე მუხლის პირველი, მე-2, 2¹ და მე-3 პუნქტების შესაბამისად სსიპ-ზესტაფონის მუნიციპალიტეტის სოფელ დილიკაურის საჯარო სკოლას (ს/კ: 230078304) 9წლის ვადით მიენიჭოს ზოგადსაგანმანათლებლო დაწესებულების სტატუსი და მოსწავლეთა ადგილების ზღვრული რაოდენობა განესაზღვროს 300 - ით. დაწესებულებას მიენიჭოს უფლებამოსილება განახორციელოს შემდეგი ზოგადსაგანმანათლებლო პროგრამები:

N	ზოგადსაგანმანათლებლო პროგრამის სახელწოდება	ზოგადსაგანმანათლებლო პროგრამის საფეხური	ზოგადსაგანმანათლებლო პროგრამის განხორციელების ენა	ზოგადსაგანმანათლებლო პროგრამის განხორციელების ადგილი (მუნიციპალიტეტის, ქალაქის, დაბის/სოფლის და ქუჩის მითითებით)
1	ზოგადი განათლების დაწყებითი საფეხურის ზოგადსაგანმანათლებლო პროგრამა	დაწყებითი	ქართული	ზესტაფონის მუნიციპალიტეტი, სოფელი დილიკაური
2	ზოგადი განათლების საბაზო საფეხურის ზოგადსაგანმანათლებლო პროგრამა	საბაზო	ქართული	ზესტაფონის მუნიციპალიტეტი, სოფელი დილიკაური
3	ზოგადი განათლების საშუალო საფეხურის	საშუალო	ქართული	

ზოგადსაგანმანათლებლო პროგრამა		ზესტაფონის მუნიციპალიტეტი, სოფელი დილიკაური
----------------------------------	--	---

საბჭოს გადაწყვეტილებით, დაწესებულებას განესაზღვრა რეკომენდაცია, 2027 წლის აპრილში 3.4. კომპონენტთან მიმართებით, ცენტრში წარმოადგინოს რეკომენდაციების შესრულების დამადასტურებელი მტკიცებულებები.“

2. ზოგადსაგანმანათლებლო დაწესებულებების ავტორიზაციის საბჭოს 2025 წლის 22 აპრილის N431707 სხდომის ოქმის მეორე ნაწილი ცნობილ იქნას ამ გადაწყვეტილების განუყოფელ ნაწილად.

3. ზოგადსაგანმანათლებლო დაწესებულებების ავტორიზაციის საბჭოს გადაწყვეტილების გასაჩივრება შესაძლებელია კანონმდებლობით დადგენილი წესით და ვადაში, სააპელაციო საჩივრის სააპელაციო საბჭოში წარდგენის გზით (შემდეგ მისამართზე: ქ. თბილისი, მ. ალექსიძის ქ. მეორე შესახვევი №2) ან ქ. თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით (შემდეგ მისამართზე: დავით აღმაშენებლის ხეივანი, N64).

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს მდივანი
ბერიკაშვილი ნინო

ნ. ჩიქოვანი

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს თავმჯდომარე
წიფურია ეკატერინე

ე. წიფურიძე

